

Rabu 25.11.09

BERITA PERDANA

2 Utusan Sarawak

Seimbangkan sumber semula jadi, biodiversiti

AGNES TUGONG

KUCHING, Selasa — Hasil kekayaan sumber semulajadi dan biodiversiti di negeri perlu diurus dan digunakan secara seimbang dalam usaha membasmi kemiskinan dan memperbaiki hidup rakyat.

Timbalan Ketua Menteri Datuk Patinggi Tan Sri Dr Alfred Jabu berkata, kerajaan Sarawak begitu komited dalam memelihara dan memulihara alam sekitar di negeri ini.

Katanya, kelebihan dari segi kekayaan sumber biodiversiti dan hasil hutan menjadikan Sarawak antara penyumbang terbesar dalam memacu ekonomi negara dalam bidang pelaburan dan perniagaan antarabangsa.

"Dalam usaha kita merancang agenda pembangunan bagi membasmi kemiskinan dan memperbaiki taraf hidup rakyat, aspek alam sekitar tidak pernah diabaikan oleh pihak kerajaan.

"Kerajaan sentiasa memastikan aktiviti pembangunan yang dirancang dilaksanakan secara seimbang dengan mengambil kira kepentingan alam sekitar dan sumber semulajadi serta kesan kepada rakyat di masa depan.

"Justeru, diadakan seminar berkaitan alam sekitar dan sumber semulajadi sebagai platform untuk golongan pakar dalam bidang ini berkumpul dan berbilang isu-isu berkaitan dengan alam sekitar," katanya.

Beliau berkata demikian ketika berucap pada perasmian Seminar Antarabangsa Ke-4 mengenai Pengurusan Alam Sekitar dan Sumber Semulajadi & Keselamatan dan Kesihatan Alam Seki-



RASMI... Datuk Patinggi Tan Sri Alfred Jabu memukul gong tanda perasmian Persidangan Antarabangsa ke-4 mengenai Pengurusan Alam Sekitar, Sumber Semulajadi, Kesihatan dan Keselamatan Alam Sekitar 2009 ditemani oleh Datuk Dr. Soon Ting Kueh, Prof. Mohd Fadzil Abdul Rahman, Dr. Penguang Manggil dan Peter Sawal di Hotel Four Point Sheraton, Kuching semalam. • RAMIDI SUBARI

tar 2009 di sini hari ini.

Tambah Jabu, kebanyakan negara di seluruh dunia berusaha menyelesaikan permasalahan berhubung isu alam sekitar yang ditimbulkan oleh individu tertentu untuk kepentingan peribadi.

Katanya, Sarawak dalam pada itu tidak terlepas daripada menjadi mangsa propaganda pihak tertentu dalam usaha untuk menggagalkan dan meruntuhkan kekukuhan perpaduan dalam negeri.

Sebagai contoh, isu Penan dan

Orang Utan sengaja diperbesar-besarkan untuk menjejaskan usaha membangunkan penanaman kelapa sawit di negeri ini.

Namun katanya, ternyata pembangunan sektor kelapa sawit membuktikan ia berjaya memperbaiki taraf hidup rakyat di negeri ini dan menjadi salah satu sektor utama dalam menjana ekonomi di negeri ini.

Pelbagai topik dan isu berkaitan alam sekitar akan disampaikan sepanjang berlangsungnya seminar tersebut, bermula pada 24 hingga

26 November 2009 ini.

Antara topik yang akan dibincangkan ialah, Kesihatan dan Keselamatan Alam Sekitar, Pengurusan Alam Sekitar, Kualiti Air dan Udara, Kerjasama Malaysia/United Kingdom dalam Perubahan Iklim serta lain-lain.

Seminar ini merupakan anjuran Institut Kimia Malaysia (IKM), Universiti Malaysia Sarawak (UNIMAS) dan Universiti Kebangsaan Malaysia (UKM).

Turut bekerjasama dalam menjayakan seminar ini ialah,

Kementerian Alam Sekitar dan Sumber Semulajadi Malaysia, Lembaga Alam Sekitar dan Sumber Semulajadi Sarawak, Jabatan Alam Sekitar Sarawak dan Jabatan Kesihatan dan Keselamatan Sarawak.

Turut hadir, Presiden IKM, Datuk Dr. Soon Ting Kueh, Timbalan Naib Canselor UNIMAS, Prof. Madya Fadzil Abdul Rahman, Setiausaha Tetap Kementerian Alam Sekitar dan Kesihatan Awam, Dr. Penguang Manggil.